

In politicher sursilvan a Strassburg

DA CLAUDIA CADRUVI / ANR

■ Theo Maissen abitescha a Sevegin. Ma radund 150 dis l'onn n'è el betg a chasa, mabain a Berna u a Strassburg.

Radund tschient dis l'onn sto Maissen ir a Berna per sia lavur sco cusseglier dals chantuns. Quaranta dis impunda el sco delegà per il Cussegl d'Europa. Perquai che Strassburg n'ha betg uschè bunas colliaziuns d'aviun internaziunalas han las sesidas da cumissiun savens lieu a Paris u en autras chapitalas, ch'èn pli bain cuntanschiblas per delegads da pajais lontans.

Experientscha sursilvana per la Rumenia

La lavur pratica che Maissen ha prestà pli baud en Surselva po el mintgatant er applitgar a Strassburg. Sco agronom sesa el en la cumissiun d'agricultura, da planisaziun da territori e d'energia. Per questa cumissiun ha el gì da rapportar davart las pussaivladads da meglieraziuns funsilas en l'Europa centrala e da l'ost. Las experientschas ch'el ha recaltgà en Surselva tar nundumbraivlas meglieraziuns èn stadas d'engrà.

En connex cun quest rapport ha el visità la Transsilvania en Rumenia – ina regiun muntagnarda selvadia. «Là hai chavorgias d'ina dimensiun ch'ins n'enconuscha betg en il Grischun.» En questa regiun faschess ina meglieraziun nair da basegn, pertge il territori è sparpaglià, ed



En la sala dal Cussegl d'Europa sesan pli che 300 deputads ed ambassadurs dals 47 pajais.

FOTOS C. CADRUVI

ils purs cultiveschan pitschnas scrotas da funs. Suenter ses rapport en il Cussegl d'Europa han ins cumenzà a planisar in project da pilot – ina meglieraziun en Transsilvania. La planisaziun è prest serada giu, ed il project vegn lura suttamess

a las instanzas da l'Uniun Europea che duessan conceder in credit da realisaziun.

Ch'il Cussegl d'Europa s'occupa era mintgatant da tematicas economicas u socialas è pauc enconuschent. I existia

vuschs criticas che din ch'il Cussegl d'Europa duaja s'occupar mo da la democrazia e dals dretgs umans. «Jau sun dentant da l'avis ch'i dovra l'emprim la basa economica per insumma pudair viver la democrazia», di Maissen. I saja per-

quai impurtant ch'il Cussegl d'Europa tegnia er en egl l'agricultura u l'economia.

Pertge davent'ins delegà a Strassburg?

«La politica exteriura m'ha gia interessà sco student», di Maissen. «Plinavant hai jau fatg part plirs onns da la delegaziun svizra per la Nato.» I saja era bunamain tradiziun ch'il Grischun haja in delegà en il Cussegl d'Europa, pertge gia *Dumeni Columberg, Ulrich Gadiant e Toni Cantieni* sajan stads a Strassburg. Sco chantun als cunfins haja il Grischun buns lioms cun l'exteriur, ed ils politichers grischuns hajan dapli interess per in tal uffizi.

Maissen è dapi il 2002 a Strassburg. I na saja stà nagin problem da sa viver en. Sch'ins haja politisà en auters parlaments enconuschian ins las estructuras che sajan dapertut sumegliantas.

E co èsi cun l'optica e l'opiniun? Èn lezzas sa midadas a Strassburg? «Sch'ins vesa ils problems dad auters stadis s'accorschan'ins che nus Svizzers ans lamentain sin in nivel fitg aut», di Maissen. Ma uschiglio na haja el betg midà sia opiniun politica. Tscherts avis sajan plitost anc vegnids rinforzads. Ins sentia a Strassburg pli fitg che la Svizra saja colliada cun blers auters stadis. «Sche nus Svizzers avain il sentiment che nus sajan suverans en dumondas existenzialas, na corrependa quai insumma betg a la realità.»